

Date – 22/09/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. PWD Minister Pu Vanlalhlana'n Mizoram ei leh bar chawkluhna ber NH-6 kawngpui chhia chu ngawrh taka siam mek a ni, a ti.
2. Aizawl khawpui chhunga bawlhhlawh paih lirthei neitute'n naktuk atanga tlan loh an tum laiin Aizawl Mayor chuan Aizawla Local Council tinte chu an veng theuhah bawlhhlawh khawn motor tlantir turin a ngen.
3. Animal Husbandry & Veterinary Department chhinchhiah danin kumin chhungin vawk pul hri, ASF vangin vawk 12,857 a thi tawh.
4. Aam Aadmi Party hruaitu Atishi chu nimin khan Delhi Chief Minister atan lakluh a ni.

<><><>

PWD MINISTER

PWD Minister Pu Vanlalhlana'n Mizoram ei leh bar chawkluhna ber NH-6 kawngpui chhia chuan mipui nunphung a tikhaihlak a, Mizoram sorkar pawhin mawhphurhna lain ngawrh taka siam mek a ni, a ti.

PWD Minister Pu Vanlalhlana leh Supply Minister Pu B. Lalchhanzova te hian nimin khan NH-6 Kawnpui leh Khamrang khaw inkar kawng siam mek chu a hmuna kalin hnthawh dan leh kawng dinhmun an enfiah a. Pu Vanlalhlana chuan, kumin hian kum dang zawng aain ruahtui a tla tam a, chu chuan Mizoram hmun hrang hrang kawngpui a tichhe nasa hle a; hmun 573 velah kawngpui hnawha leimin a awm, a ti a. Mipuite pawhin sorkar hmalaknaah tha thawhin Central YMA, NGO pawl hrang hrang, Mizoram Truck Owners' Association, Mizoram Truck Drivers' Association, Comercial Vehicle Owners' Association, Kolasib DC leh Police te bakah khawtlang hruaitute an tangkai hle a ni, a ti.

Pu Vanlalhlana chuan, tuna sorkarin kawng chhia a thum that mek hi a chhe zualpui siamthatna chauh a la ni rih a, furlai a nih avangin duhthusama siam theih a la ni rih lova, ei leh bar leh ni tin mamawh a lo luh theihna tur ngaihtuah ber rih a ni a, hun a lo kal ang a tha zawk leh mawihnai zawkin sorkarin kawngpui hi a thum tha zel dawn, a ti.

PWD Minister Pu Vanlalhlana hian Aizawl Falkland venga World Bank kawng lei tla hniam pawh a hmuna kalin a enfiah a, siam that dan tur leh bawhzui dan tur department hotute a sawipui nghal a bawk. He lai lei tlak hniamna hmun hi kawngpui inkalpawhna pawimawh tak a ni a, tunah hian lei tla hniam hian kawng chanve aia tam mah a lak hek avangin motor lian leh full load tan chuan zawh ngam a ni lo a, hei hian harsatna a siam nasa hle a ni.

Minister sawi danin, he lai lei tlahniam siam tha tur hian sorkar chuan kawngpui chhak lam Assam Rifles ram la heka kawng zauh turin ruahmanna a siam a. Assam Rifles te ram hi Land Lease siam a la nih loh avangin he kawngpui zauh tura ruahmanna hi kaltlangpui theih an inbeisei a, a rang thei ang bera he hna hi thawh thuai an tum a ni.



GARBAGE VEHICLES TO PROTEST FROM MONDAY

Aizawl khawpui chhunga bawlhhlawh paih lirthei hman man rualkhai leh mumal siam phutin bawlhhlawh paih lirtheite naktuk Thawhtanni atang khian tlan loh an tum.

Aizawl Garbage Truck Owners' Association (AGVOA), PPP Mode Bawlhhlawh Paih Welfare leh Sanitation Driver & Handyman Associatioan (SD&HA) ten Aizawl Press Club-a chanchinbumite an kawmnaah Thawhtanni atanga an din tur thu hi an sawi a. Pawl pathumte chuan bawlhhlawh paih motor hman man rualkhai leh mumal zawk, veng tin hlat dan mil zela siam tha turin AMC thuneitute hnenah vawi engngemaw zat an lo thlen tawh tih an sawi a. AGVOA chuan October ni 25, 2019 aṅang khan Bawlhhlawh paih motor hman man siam tha tur hian lehkhain vawi 8 lai an lo thlen tawh tih an sawi a, hei bakah hian PPP Mode Bawlhhlawh Paih Welfare-te pawhin bawlhhlawh paih motor hman man siam tha tura ngenna vawi eng emaw zat an lo thlen tawh tih an sawi bawk a.

Hetichung hian tun thlengin bawlhhlawh paih lirthei hman man veng hrang hrang hlat dan mil pawh ni lo, a kilometer ang zâwnga chhuta 'rate' inanglo tak an la hmang mek chu pawh an tih thu pawl pathum chuan an sawi a. Dik tak leh rualkhai taka bawlhhlawh paih lirthei hman man bithliah an duh ber chu rei tak an nghah hnuah pawh heti mai hi an dinhmun anih avangin Aizawl khawpui chhung mipui bawlhhlawh khawntu, AMC bithliah rate hmangtute chuan Thawhtanni atangin, 'Tiam chin awmlo va din vek tur' an ti ta tih an sawi.

Bawlhhlawh paih motor hi LMV, pick- up truck leh a tlukpui 69 leh MMV, 407 leh a tlukpui 82, a vaiin lirthei 151 a tlan mek a ni.

Hetihlai hian Aizawl Mayor chuan nimin khan Aizawla Local Council (LC) tinte hnenah thuchah tichhuakin an veng theuhah bawlhhlawh khawn motor tlantir turin a ngen a, eng emaw harsatna awm thei veng turin police duty turte pawh ruahman a ni dawn, a ti a. GVOA-in thuthar lakhawmtute an kawmnaa an tarlan angin rate hi a khât tawka san thin a ni a, diesel man sang leh senso sang zelah ennawn leh tum mek a ni tih a sawi bawk.

Mayor chuan bawlhhlawh paih motor hi PPP mode-a kalpui a nih avangin mipuite pawisa thawh tur a nghawng tel dawn tih sawiin, AMC sum dinhmun leh mipui thawh ve tur uluk taka chhut a tul a, hmanhmawh taka tih mai a harsa, a ti a. Naktuk khian City Local Council Association hruiute leh GVOA hruiute hi inbiak leh an tum a, harsatna siam lova sawi fel theih ngei an beisei tih Mayor chuan a tarlang bawk.



SWACHHATA HI SEVA

Nimin khan Aizawl District chhunga Faina Beihpui Thlakna ‘Swachhata hi Seva 2024’ kal zelah Aizawl MINECO, Tlangzawl leh SIPMIU Road inkar Khatlaah DC Pu Lalhriatpuia hovin Faina hnatlang thawh a ni.

Mahni nunphunga Faina leh thianghlimna seng lut theuh turin kalkhawm ten thu an tiam a. Aizawl DC chuan he hnatlangpui hi hawngin ram fai leh thianghlim nei tur chuan nunpui a tul thu a sawi a. Naupang zawkte atanga intuh a pawimawh thu leh chumi tur chuan thil tiha inzirtira intihhmuh a hlawk thu a sawi. DC chuan mahni hma zawn theuha hma la vek turin kalkhawmte a sawm a ni.

He hnatlang hi Directorate of Women & Child Development ruahmanin Cleanliness Target Unit/Black Spot atan hnatlanna hmun hi thlan a ni a. New Capital Complex Branch YMA, DC Aizawl leh UD&PA te thawkhoin faina hnatlang hi thawh a ni.

He hnatlang hawna inkhawm hi Pu R. Lalrosiama President New Capital Branch YMA chuan kaihruiin Pi Zoramthangi Chhange, Director, Women & Child Development chuan kalkhawmte thutiam lakna hun kaihruiin thu a sawi a. Mizo te ram neih chhun vawnhim a pawimawhzia leh bawlhhlawh paih thin dan ten ecosystem an tih buai theih dan bakah mi tinte midang entawn tura hma hruaitu ni turin a chah a ni.

Directorate of Women & Child Development-a thawkte bakah New Capital Branch YMA member te atangin mi 200 chuang hnatlangah hian thawk chhuakin Aizawl DC leh UD&PA te remruatnain bawlhhlawh paih motorin an hnawmhnawk tihfaite hi paih nghal a ni.

Lungleiah pawh nimin vek khan Urban Development & Poverty Alleviation (UD&PA) Department, Lungleia thawkte chuan Lunglei Pukpui dai kawng dung leh kawng thlanga a paihna hmun ni lova bawlhhlawh paihte an thian fai a. Pukpui CTU hi Swachhata Hi Seva 2024 kalpui chhunga Lunglei khawpui huam chhunga vantlang hmunhma then fai ngai bik ruahman pariat zinga pakhat a ni.
(DIPR)



ASF

Animal Husbandry & Veterinary Department chhinchhiah danin kumin chhungin vawk pul hri, African Swine Fever (ASF) vangin vawk 12,857 an thi tawh.

Nimin khan ASF vangin vawk 43 a thih belh leh a, vawk 118 suat a ni. Kumin chhunga vawk suat tawh zawng zawng hi nimin thleng khan 22,087 a ni. AH&Vety department chhinchhiah danin Mizoram chhungah African Swine Fever (ASF) hian veng leh khaw 237 a nghawng a ni.

Serchhip District Veterinary Office Report tarlan dan chuan, Serchhip District-a Vawk hri len mekna veng leh khua 6-ah nimin khan Vawk 21 thi lehin hrienna veng leh khua 4-ah vawk 24 suat leh an ni a. Nimin bikah hri len mekna Chhiahtlangah vawk thi tam berin vawk 11 an thi leh a, vawk suat tamna ber New Serchhip ‘N’ ah vawk 12 suat an ni.

Serchhip District pumpuiah African Swine Fever (ASF) vang hian Vawk 3308 thi tawhin vawk 6659 suat an ni tawh a. ASF avang hian Thenzawlah Vawk thi tam tawh berin vawk 1056 a thi tawh a, Chhingchhipah Vawk suat tam berin Vawk 1304 suat a ni tawh bawk a ni.

Serchhip District-a Vawk hri lenna veng leh khuaah te hian Vawk 4284 la awm anga chhinchiah a ni a. District chung Veng leh khua engemawzat chu ASF hri len mekna 'Infected Area' ah puan mek a la ni bawk a ni.

<><><>

DELHI CHIEF MINISTER

Aam Aadmi Party hruaitu Atishi chu nimin khan Delhi Chief Minister atan lakluh a ni.

Rajniwas-a inkhawm buatsaihah Delhi Lieutenant Governor V K Saxena chuan Atishi leh a Council of Minister-te thu tiam tiamtirin a la lut a ni. AAP hruaitu Gopal Rai, Kailash Gahlot, Saurabh Bharadwaj, Imran Hussain, leh Mukesh Ahlawat te chu Cabinet Minister atan lakluh an ni. A hnuah press conference-ah thu sawiin Atishi-i chuan Delhi mipuite rawngbawl tura hetiang mawhphurhna lian tak a pek avangin Arvind Kejriwal-a chungah lawmthu a sawi a. Hmasawna hna la awm mekte kalpui thuai a nih tur thu a sawi bawk.

<><><>